

**NAPOLEOUN**  
**VO**  
**LEIS RESTOS DOOU GRAND HOMME.**

FRANÇAIS, veici lou jour qu'avès tant souhéta!  
Poude ti réjouir, tei vœux soun escouta.  
L'homme qué fatiguèt l'indoumptable victoïro,  
Qu'a grossi deis très quarts nostros mouderno historo,  
En élevan la Franço à seis plus haous dégrès;  
Aqueou en qu' deven tan d'immanses prougrès.  
Lou martir générous de la santo alianço,  
Prisounier deis Anglès per troou de counfianço;  
Seis restos précieux lâchamen escoundus,  
Après dex-et-noous ans nous van estre rendus.  
N'ouura plus per toumbeou uno îlo de bicoque;  
Enfin per l'amperour qu'illustrèt soun époquo,  
Entarra paouramen sus un roc, lou cinq may,  
Justiço si rendra!!. Voou may tard que jamay.  
Tout ce qué dessouto eou jadis pourtet leis armos  
Es dins aqueou moument atendris jusqu'eis larmos.  
D'exprima soun amour si poudout pas ténir;  
La plupart, dé vingt ans si sentoun rajouinir.  
Leis uns n'en soun surprés, à péno v'aoujoun creyré;  
D'aoutrés sount tant countens, qu'an pou de va pas veyré.  
Es pourtant ben veray, d'aquest'houro es permes  
De dire: arrivara dins très vo quatre més.